

La Quotidiana 9-2-2016, p. 2

Pro e contra l'iniziativa per l'expatriament effectiv

■ (rtr) In'emprim'iniziativa dal pievel da la pps per il repatriament d'esters criminals ha il suveran gi' acceptà il november 2010. L'iniziativa ha dà tschintg onns temp al parlament da realisar ina lescha. Quel temp da tschintg onns han las duas chombras dal parlament respectà ed il mars da l'onn passà han ellas approvà ina lescha correspundenta che va en vigur sche l'iniziativa na vegn betg acceptada ils 28 da favrer. Dentant, gia il 2012 ha la pps inoltrà ina segund'iniziativa per il repatriament d'esters. Quai cun l'argument ch'il parlament na fetschia betg enavant cun la realisaziun da l'emprima iniziativa e che la lescha na resguardia betg la voluntad dal suveran. Quell'iniziativa è formulada sco ina lescha ed enumerescha a moda detagliada tge delicts che mainan al repatriament automatic. Ultra da quai sclauda ella facticamain il princip da commensurabladad.

Tenor ils adversaris metta l'iniziativa uschia en dumonda noss sistem democratic e violescha princips impurtants da noss stadi da dretg. En in tal stadi formuleschia il parlament las leschas e las dretgiras possian examinar mintga cas per sazez e resguardar il princip da la commensurabladad. Era delicts marginals, uschenumnadas bagatellas, possian manar ad in repatriament. Uschia èsi pussaivel ch'in Talian ch'è naschì en Svizra vegn repatrià perquai ch'el ha survegnì avant onns in chastì perquai ch'el è charrà memia spert ed è stà involvì ina saira en ina baruffa. Omadus sajan cas per ils quals in delinquent svizzer na stoppia betg temair in chastì draconic. Plinavant haja il parlament pinà ina lescha severa che possa ir en vigur immediat suenter in na a l'iniziativa da la pps.